



Aqqalu C. Jerimiassen
Atassut

UPA 2026/207-1
13. maj 2026

Qanoq iliornikkut kommuunit akornanni aningaasaqarnikkut innuttaasullu katitagaanerisigut naligiinnerulernissaq anguniarneqassanersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Erik Jensen, Siumut)

Kommerujussuit pilernerat, akileraartarnermut aqutsisoqarnerup eqiterunneqarnera, peqqinnissaqafiup eqiterunneqarnera, angallannikkut aqqissuusisimaneq il.il.

Ila nunarput ukiuni kingullerni 20-ini aatsaat taamak immaqa oqaluttuarisaanermi eqiteraluni ingerlataqarsimaqaaq.

2009-mi namminersorneq eqqunneqarmat siunissamut qaammarimmik oqalunneq, nammineq sumiikkaluaruttaluunniit oqartussaaqataanitta nukittornissaa allarpassuillu, ila naak?

Atassummiit qiningaatitaasarsimasut arlariissuusut ilaallu maanna qanganngoreersut, ila ataasiaannaqinatik eqiterussuineramik politikkeqarneq assuarisarsimaqaat, annerusumilli tiguneqangaartarsimangitsumik.

Kommunerujussuit tassani assersuutissaqqipput, qallunaanut ataniaannartutut tikkuartorneqartarniaasaarluta nunatsinni periuseq namminiilivinniarnepaasutut inissisimasuusuniit taamanikkut suliarineqarnialeriarpoq qanormita? Qallunaat nunaanni pisut ilaarlugit.... Quianaannangajapporluunniit kingumut eqqarsaatigalugu, kikkummita tassani taava ikaa kalaallinik illersuisuusimappat, illersuisuusimasut erseqqinnerpaamik tassaapput Atassut.

Aningaasarsiornikkut eqiterussigaluttuinnartilluta, pisortaqarfiillu nangittumik qitiusumut iliorartuallugit inuiaqatigiinni maanna kamak atuuttoq, aaliangersimasunillu politikikkut atorluarneqartoq minneruleqqajarunngilaq.

Ilinniarluarsimasut Nuummut annerpaartaasa nutserartuarnerasigut sinerissap sinnerani katataagaluttuinnarneq, atorfinnillu inuttaliiniarneq unammillingassaq anneruleralluttuinnarpoq.

Ajoraluartumillu unneqqarilluinnassagaanni aqutit ima ittu ullutsinni atuupput; sinerissap sinneraniit avannaaniunerusoq Ilulissanut nuussinnarluni, Nuummut kingorna nuussinnarluni naggaserlugu Qallunaat nunaannut avalalluni.

Ila killiffipput eqqarsarnaraluaq, tassanili immitsinnut qiviartariaqavissorlugu, systemi atungarput inuiaqatigiinnut iluatsissimangilaq.



Nunarput sineriammiunut agguqaasoq sineriammiut qapiarusaarneqarput, naggasissuarput kiisa immaqa ukiut 30-it qaangiuppata, nunatta inui sinerissamiittut immaqa 10.000-illuunniit ataateqqalera.

Ernummatigut ilumut tassa maannagaaq eqqartorniartigit, inuiaqatigiittut aaqqissuussaanerput tamaat nutarterniartigu, inoqqortussutsitsinnut nalimmassagaasumik systemimik aaqqissuussiniarta.

Ilinniartitaaneq aqcutigalugu soorlu maanna Avannaata Kommunia ilinniarnertuunngorniarfeqanngilaq, nunarpullu tamakkerlugu agguaqatigiisillugu ilinniangaqassutsikkut appasinnerpaamik inissisimasooerluni, tamaattoq aningaasarsiornikkut nunatsinnut kivitsisutut inissisimasuujarluni.

Tassani suna malittaava? Kamak tunulliusaasutullu misigisimajuarneq annertuumik atuuppoq, tamannalu nammineq ukiorpanni politikikkut sulianit ajoraluartumik sullarliortuartarsimanermit aallaaveqarpoq.

Siunissamut tamakku ilinniutigalugit atuinartariaqarpagut maanna pereersut, taava periusissamik erseqqinnerpaamik peqaqqittariaqalerpugut kommunit aaqqissuussaanerisa nalimmassaqqittariaqarnissaannut, nunatsinnilu inuuniarnikkut atukkat nalingiinnerusinnaaqqullugittaaq eqiterussiuarnerup qanoq ilusilimmik sinerissamut siammaanerusinnaanermik ukiunut arlariinnut atuuttussamik pilersaarusiulereertariaqarluta, uungaaraanngitsoq, ukiunut qulikkaanut atuuttussamik.

Kommunit kattuffeqarnerat tassani atungarissaarnikkut aaqqissuusseqqissagaanni aqcutissaanersoq ilanngullugu eqqartortariaqarpoq, najugariuminarsaanerlu tassani sumiiffiit orniginarnerusarlugit nunamut namminermt naalakkersuisoqarfik kommunit tamaasa qanimut suleqatigalugit periusissiaqartariaqarpoq.

Sulisoqarnikkut inerisangassat sorpassuit aningaasarsiornikkut nalingiinerunissamut qulequtaapputtaaq imaannaanngitsut, sulisinnaasut ikiliartuinnannginnissaat kommunit ilaanni eqqarsaatigalugu, akileraarutitigut isertitat qaffassarnerusinnaajumallugit, suliffissanik qanoq annerusumik inerisaasoqarnissaanut eqqartueqatigiinnissaq pingaartuuvoq. Tassani takornariaqarnikkut assersuusiunnaraanni, soorlu Ilulissat takornariaqarfissuurtut inissisimasuutilluni nunatta avammut nittarsaanneqarnera sooq Ilulissaniit ingerlanneqanngila? Sooq Visit Greenland ilulissaniissinnaanera eqqarsaatigineqarsinnaanngila assersuutigalugu?

Tamakku tamaasa puttallakaatissinnaasariaqarpagut sineriammi ineriartorneq aningaasarsiornikkut nalimmateqqilissappat.

Atassummiit oqallisissiaqartumut qujalluta, taamak oqaaseqarluta siunnersuut naalakkersuisunit tigullarneqarumaanera neriutigaarput.